

九



海寧陳氏家譜卷第十六

十二世孫應麟重編

十四世孫敬璋全訂

大傳二

第九世文學覺菴公


公諱穎伯字師孟文學理川公之第二子也少踵理川公家學敏幹能文游黌序有聲然貧甚嘗躬耕田四畝值大旱收穀擔石許盜竟胙之而去外舅葉孝廉至不能具衣冠假隣翁白苧衣出見孝廉為歎息然性骨耿介不受人憐嘗曰學者以治生為本治生以克己為先



海寧陳氏家譜卷第十六 大傳二

乃可大可久之道妄取奚爲哉設館每辭多就寡布衣
紉履早作夜思至四十而薪水粗贍至五十而室宇落
成至六十而闢田三數頃教四子俱成雋才汜可小康
而公力亦殫矣性宏直優裕鄉黨有小爭訟輒和解之
有急難輒營救之雖徒行百數十里以急之弗倦也雖
弛已刻不容緩之事以急之弗恤也端視矩步臨事從
容鎮靜沛然若無事者故雖諸生人倚之如長城天塹
配葉夫人摒擋釵珥親操井臼相夫成家壽登九袞有
三具著儀法於戲勤逸儉侈家之成敗係焉鳴梧公以

還再世不競未免不節之嗟耳公劬躬者事職思其居
承前啟後豈細故哉夫驕奢淫佚席萬鐘弗足恃也稼
穡艱難所其無逸不階尺土何患焉如公者可以昭今
德示子孫矣



第九世文學篤行先生

公諱之虹字陽滌號孚敬又號大滌文學霽濤公季子
至性天成庭除以內油然藹然不自知其爲孝友也幼
即篤志讀書家事則一聽于兄出入勿問始猶專事帖
括鎚幽鑿險以爲能旣喪父則痛念曰向來習科舉文
字思取青紫逮親存而不得志命也如何我生自有天
爵之貴歸全之孝何自隘吾志爲遂慨然求心性之學
鍵戶獨坐神明內養間爲文必根極理要刊落浮詞洒
洒乎如自道其所得久之心目間豁然開朗然竟以發

憤致病漸劇會兄毅齋公歿二孤甚幼公撫之逾于所
生析產授廩推肥就瘠從姪之便即已甚不便亦不計
有奪姪腴產者公自傷病不能禦侮割已產償姪姪後
成立不失業則公力也居母喪朝夕饋奠如生存雖病
甚不假手僮婢毅齋公歿既久寡姊爲無賴族人所齟
齟公力疾理鬻羣鬻姊家卒賴以全三黨有缺失爲彌
縫補救皆心服其恩義即奪姪產者後更親附焉公病
三十餘年幾於辟穀兼值明季超然遺俗然未嘗一日
廢學究儒釋朱陸之異同刪輯經史諸書詩古文辭一

歸於正評論古今商榷得失雖閒譚曲藝必推之政與
學以爲有同源而無二致易篲前一日猶與客論學次
早與醫論方藥從容如常時語畢端坐而瞑先是公營
父母葬穴有水復改兆皆以兄從葬昭次自爲壽藏於
穆至是亦從葬焉生平著述盜起亡佚惟自訂制義尚
遺一編公未病時行散至大滌洞天輒歎學者氣稟物
欲之累非大滌之不可故自號大滌山人旣歿士林私
謚曰篤行先生



第九世大叅魯直公


公諱之伸原名甫申字申父贈刑部郎區吳公之長子而贈刑部郎增城公之繼子也生而穎異治麟經有聲天啟辛酉受知于錢虞山先生五上春官崇正甲戌登乙榜為親祿仕得廣平令時四方多故征繕軍需公至訪疾苦斥奸黠省征斂民得少安息且請除四府津梁大戶之患賢聲噪三輔調繁內黃適濮州賊李雲三攻內黃公築重城十二里濬郭外壕五尺徙民入城簡健兒教以擊刺製火砲弓弩雲仰視不敢發一矢丁丑晉

上元尹上元時爲陪京首邑江黃郢蔡間寇盜充斥恃
公爲金湯舊例畱都內外守備事得下畿縣如屬邑公
爭之內守備氣甚張欲挫公公以祖法語之南和伯方
公時爲外守備握公手謝卒改移用敵體三任親民之
官皆以布惠剔奸倡興文教爲任征科用一緩二未嘗
取一贖錢去之日無不涕泣攀畱戊寅以刑部主事徵
時公卿宰執多撻罪就園扉公調劑其間如黃解之獄
久而得白而一時所蔓及者如南海陳子壯諸公相繼
盡解大司寇以是賢公推恤刑山左多所平反破械而

出者四千餘人，事竣命鞫審清理十三司事，奏繳二百餘案，請增囚糧月十六石，煤月千六百觔，著為令。朝審前一日，每囚給衣被，或謂囚且死，安用此？公曰：澤及枯骨，况囚罪未定乎？例當補京堂，或勸公一謁要路，可得符卿，公辭之。卒遷山東，參議奉母旋里，中道疾作，因就吳撫乞告，而東省適有事，垣臣以逗畱糾公公與疾至東省，對簿攷按，告病，月日在東省，未有事前，得白，推補福建漳泉道，不赴。明年補上江糧儲道，以督餉功，加叅政，特假監軍銜，以節制諸帥。丁內艱，歸服闋，督撫交推。

公手書勸駕公以年踰六十義可懸車遂不出家居益
修敦睦若未嘗貴者郡邑有大利弊必爭戚友有過必
斥然事往即不畱意就之如坐春風事母沈太宜人至
孝易簣時公年已六十猶作孺子慕他若分俸以給弟
割產以援妹壻兄弟子及親舊子之無依者使與諸子
雜處教誨率賴公成名有同僚某錦衣歿遺孤應齮貧
不能上達公攜之京師得補世職然皆不自以為功生
平於博奕遊戲園池花木聲伎絲竹之類一無所好惟
客攜名書畫至不惜傾囊購之故所藏獨富所著有徵

吾隨筆記國家典故疆事紀要事物考若干卷卒之日
里巷之人皆出涕祀鄉賢宦轍所至俱祀名宦





第九世少保大學士素菴公


公諱之遴字彥昇大中丞孝威公之長子也才性英敏
湛於經術早負公輔之望天啟甲子舉於鄉年才弱冠
耳五上公車至崇禎丁丑捷南宮廷試第二人授翰林
院編修編纂六曹章奏不二年而丁中丞公艱且以中
丞公事連坐不復叙用公蒿目時艱盡傷庭禍山間水
間甘自廢棄不復有仕進之意而一時人情冷煖路鬼
揶揄不徒雀羅門巷已也我世祖章皇帝龍飛御宇
之四載搜錄遺賢召補侍讀學士未幾擢少宗伯加副

憲時文運肇啟公爲文以程式多士風氣一歸於正復
增解額廣明經辛卯陞大宗伯加太子太保壬辰特
簡內秘書院大學士廣闢言路起用諫臣時方議裁兵
以紓國用公密陳調遣機宜俾無失所軍無怨讟遇廷
議大事持正不阿尋出爲戶部尚書度支旁午指畫力
辦西南猶宿重兵爭憂措餉公乃告之曰爲國而憂貧
是加賦之漸也但恐莫能視國如家耳終吾任必不以
匱乏貽公輩憂領大農二年國有餘財民無重賦入爲
宏文院大學士其所薦引若李際期張秉貞崔宗泰輩

皆為名臣初未嘗識面也公故通達國體嫻習掌故時
興朝定鼎一切締造惟新起公重用因革釐定出公
手者居多惜不久被謫沒於戍所行畧志乘缺焉而不
傳者多矣自公盛時機敏練達一時無出公右世祖
甚器重公六年而登宰輔然竟以此遭時所忌且性愛
結客後門寒畯率賴公提攜交游書問往來絡繹初謫
盛京旋即賜環復有泥公與中使往還者乃再謫不復
返矣歿後五年聖廟謁陵徐夫人上疏乞歸骨
特命家屬扶櫬以還時康熙庚戌十月也公為文淵

秀贍結搆縝密具燕許氣格尤長於詩少壯時引繩切墨古體必漢魏律體必盛唐罔失尺寸既而謂作者率其性情才學之所至則亦各爲其人之詩爾數章而古人之遺意錯出焉可也一章而古人之精蘊融會而出焉可也合而觀之亦漢魏亦六朝亦唐可也非漢魏非六朝非唐亦可也上德不德大道無功而況於言乎言而至于文文而至於詩賦抑末矣而斤斤焉矜位置爭美好是亦不可以已乎於戲以公之才之識之望蓋不
得已而以詩傳者故其論詩如此生平夷險悲愉一寓

之於詩謫後詩益多益工自題其集曰浮雲晚年曠達
舒卷無心大都作如是觀也






第九世封諭德贈大宗伯簡齋公


公諱之問字令升一字近思贈大學士無爲公長子明隆萬中家門科甲鼎盛公以諸生領袖貢入辟雍不以華撫爲意好讀書自六經三史以下八家之集唐宋之詩丹鉛殆遍高會廣座有所徵引長篇累牘應口吟誦以架上書覆之不爽一字吳志伊作十國春秋公曰古人著書以爲法戒十國人物乘時盜竊皆出下中何庸追述其行事乎嘗言侯朝宗王于一二子文之佳者尚不出小說家伎兩其評騭古今不肯隨風附和如此于

書畫古奇器賞鑒無不精絕青烏素問龜卜雜術皆能
言其理公從學戴山漳海兩先生得其傳嘗論學在天
地有宗有翼宗之者一人翼之者數十人所謂疏附後
先也堯舜去人其間亦邇禹臯伊萊望散亦止畧舉以
例其餘顏曾既往董韓未與孟子以一身任仲尼之道
之重開繼茫茫有宗有翼所謂軻死而不得其傳者已
於篇末無有兩歎寓之蓋孟子之憂患深矣有宋絕學
既明至考亭而集成門徒甚盛史不勝書迄於元明允
續之際許姚趙竇洛學行於北金吳虞許聞學彰於南



以逮柳黃吳宋之徒莫不推究精微張皇六藝卒開三
百年文明之治可不謂有宗有翼之極盛者歟前明學
脉莫盛姚江翼之者爲江右爲淮南爲東越雖復功咎
叢生末流雜運然而敝之所生救之所始也剝之寢微
復之寢昌也吾學蓋未嘗一日絕也余攝齊葢山漳浦
兩先生之堂兩先生之學原本考亭追溯之濂溪二程
以達於孔孟而一時門徒未見有董裳黃幹之儔者何
其寥寥歟公爲此言意蓋自任其深造自得傾折前賢
絕不標奇樹幟可以想見論學非其人弗輕談止談詩

文即詩文亦不輕作或問之曰以先生之學而為詩文
必傳無疑也公不應與姚江黃徵君宗義同出哉山先
生門相友善徵君曾為公作傳今隳括書之




第九世封詹事贈大學士容菴公

公諱之闇字始升贈大學士無爲公之季子也英姿大
挺儀觀偉甚年十二而孤執喪如成人服闋補博士弟
子貞嘗從范文白先生游畋漁墳典繩墨聖賢而曠解
出人頭地慷慨激昂函蓋一切能勝千里重遠之任不
爲凡席旦暮之謀卓然振拔卒如平意之所期而後快
明季將亂公盡散其橐於貧民尋盜起謀焚劫其里羣
詬之曰陳君善人保無焚石及玉遂罷散鄰賴以全兵
燹之際偕陸夫人奉母夫人藏一舴艋中晝匿宵行母

夫人意不樂公入水取鮮鯽陸夫人手調而進之以佐膳承歡嘗爲羣盜所脅公談笑解諭神色自若盜慚沮飲公酒公極酣而寢逮明盜竟捨去耿逆之變風鶴震驚邑人爭出城避公獨鎮靜如常順治辛卯以選拔入成均時拔貢皆授郡司李公無倖心歸踏省門屢不得志於有司公亦無愠色未幾丁母夫人艱哀毀之餘若有所感輒慨然曰世競功名因人錄錄訖無所就雖青紫弗足尚也大丈夫承累世之業流長則難竭柢深則難朽積之培之於以光前裕後善厥貽謀斯亦志之至

大而事之至難者日夕不遑克自樹立出與處奚別焉
遂杜門刻勵夙夜操修教元龍輩以立品敦行謂讀書
人纔以第二等自居便是庸下較課文藝亦不少寬名
師益友延致家塾聽朔望一出館其家書至必留待朔
望前一日方傳惟恐分讀書念後諸公登上第俱銜感
曰公不唯一家嚴君亦吾輩畏友也微公之琢磨不及
此康熙戊午元龍忝列賢書而仲叔兩弟相繼下世各
遺一孤公復以教子者教孫迨元龍及季弟嵩先後通
籍邦彥登詞苑邦懷膺鄉薦公手書屢勗致身朝宁砥

礪名節為先勿以一第自域勿以半通自炫不及他語
節縮之餘業稍稍振然自奉益薄誠子孫曰居家儉則
居官廉公之訓誨語語可刊庭誥固未易覩縷述也性
坦率表裏如一親友有過即正言匡救尤好施予屢免
質庫之息歲無秋則捐賑平糶以紓窮困久而弗倦姪
堪永夫婦孝節幾湮沒公捐貲俾其嗣籲請當事題旌
之經紀高曾墓產既遵先王父遺命助田五十畝復擢
節贏餘數千緡以授代者置田贍宗人澤流無窮公雖
為善於鄉然 聖祖仁皇帝熟知公名 南巡時公兩



次迎 鑾道左 名對移時鄉邦利弊直陳無隱 上

改容禮焉

御書鳩杖龐眉四大字以賜 目是賞賚無

虛歲甲申公有脾疾元龍陳情乞養蒙

賜人葭寶硯

等命捧歸以榮之又三載公以脾症復發卧起牀第者

數日吉祥而逝奏聞 天子悼焉謂東南失一耆碩遣

官致祭 知遇之隆恩禮之厚生榮歿哀至於如此公

之所期者遠而所樹立者大矣於戲公之少也有士行

之辛劬公之晚也有太邱之風範公之志量如宗元幹

公之節槩如和長輿公之家教勤同韋賢之遺經公之

門風儉若柳玼之示訓公之葆年爲麗德公之視聽不
衰公之集福爲王晉公之植槐而即爲萬石君之持盈
戒滿記有之其先人有美而弗傳是不仁也元龍荷

聖天子厚恩得乞骸骨視蔭餘年大思先德之隕越謹
錄其實著于簡於戲監於成憲繼序思不忘是在吾子
孫矣

第九世司理岱清公

公諱殿桂字長生駕部昭華公仲子也賦姿穎悟嗜古
書蒐羅忘倦清才鵠舉爲詩古文辭雲間陳卧子前輩
一見目爲鮑謝崇正癸未舉進士授兵部主事未任歸
養其親 國初臺使者收采人望公以杖策著勞幕府
捍西寇拓邊數百里增戶口不下鉅萬俾東西海咸隸
職方撫軍奇之欲以方面薦公固辭就高州府推官兼
攝壽康篆數從直指按部持法峻而行法寬民以不寃
當公讞却暮金者再奉令勘荒信宜歲益軍賦七百石

有奇午酉兩闈之役先後得名士十九人聯捷者過半
文教一時稱盛歷任數載績居上最以同官構隙吏議
俱罷斥中丞特疏寬之得賜環歸途至番禺得疾而逝
粵人悲之公嘗與僧澹歸唱和王司空覺斯龔宗伯鼎
孳並爲文贈之稱文章領袖見兩公集中所著有嶺南
浮沉草弦閣詩與袁堂文集等藏于家

第十世理學乾初先生

先生諱確字乾初原名道永字非元文學覺菴公之季子也覺菴公生四子俱遊黌序有名先生弱而才父兄特器重之從伯兄授經鄉賢許同生先生目爲小友且指示子弟曰若曹雖與陳生同學不日即當師事之矣其見重於前輩已如此讀書不屑屑章句毅然期至於古之立言者尤厭薄舉業姑爲之以副塾課之望皆受知學使者黎許兩公舉茂才廩於庠後遭喪亂敝屣棄之泊如也明季有飭法吏先生唱義聲籲當事當事庇

其人欲中先生以法先生色不爲動尋太府劉公雪濤
救免事聞輦轂當事與吏俱坐黜先生亦不色喜早年
論學於諸儒中最喜姚江知行合一之說謂可與孟子
道性善同功後與祝孝廉淵遊戢山先生門奉慎獨之
教躬行實踐重規疊矩旣而祝以節顯先生則巋然長
德望於一鄉皆不愧師門心印所謂其趨一也接引後
學娓娓不倦一時志義之士從遊日衆與兄子潮生爰
立輩表章家學酌立族規講明宗法建遷祖祠宇宗人
旣庀其材矣其堂寢規模主祀制度一出先生釐定晚

年構地十畝有奇營葬考妣奉其三兄雁序以祔而已
亦置生壙焉令支下子孫艱于覓地者皆可祔入先生
蓋倣古族葬之法以爲支分本一血脉相聯生則聚廬
而處沒則共域而葬且使春秋展墓時子姓兄弟咸在
其酌古準今法良意美皆類此詩文清真大雅寄托深
遠其發明理學尤多心得下筆立就無纖毫障翳書法
直逼鍾王撫琴吹簫時奏于山巔水涯篆刻博奕諸好
無不工自奉教戢山後一切陶寫性情之技視爲害道
而屏絕之向之勇於一往遇不平而輒發者亦視爲任

氣而融釋之社集講會以爲無益身心每婉辭不赴尋
病廢幾二十年足不及中庭君子謂不異袁閎之士室
所著有大學辨禪障性解學譜葬論喪俗家約諸書其
餘雜著不下數十萬言俱藏于家居母喪手寫孝經百
餘冊志痛戚友爭寶藏之於戲先生爲余兄而五十年
以長余少時每見先生過從先大夫必肅衣冠迎之指
爲後生矜式今先生下世六十年矣而古貌古言髣髴
如昨詩有之雖無老成人尚有典刑宗之人有仰老成
而遡典刑者乎則有先生之遺文在

第十世封徵仕郎贈奉直大夫瞻山公

附長子燾
次子熹

孫麟

公諱會永字震孫大叅魯直公之仲子也少治春秋舉
茂才入南雍以積分拔明經賦注純孝年十五遭母丁
恭人之喪擗踊號痛毀瘠幾不起時大叅公作令畿南
祖母沈太宜人在堂公居家事太宜人左右先意大叅
得無內顧憂大叅分藩病歸被劾詣歷下質訊公侍奉
往返一切藥餌及對簿皆一手經營大叅病獲痊事亦
大白迨歸里後家漸中落公割已受分之產以贍諸幼

弟居繼母丁恭人喪哀戚如前治兩慈親窶窶拮据成
禮洎丁大叅公艱年已踰艾猶孺慕致毀生平不事生
產遇朋友戚黨之急欣助不遺餘力賓至曲盡欵洽座
上常滿家塾中延致名儒丙夜篝燈手自丹黃甲乙諸
子文譽鵲起即諸名士被月旦者往往藉公成名康熙
乙卯季弟黃永從弟齊永幼子勲同舉鄉薦丙辰齊永
勲同捷禮闈公誨之曰汝輩做秀才若處子今出身事
主尤宜砥礪名節勿負主知勿墜祖緒其以正訓示子
孫如此辛酉秋偶得脾疾入冬漸甚卒之夕解頤欠伸

而逝頃之兩頰微紅肢體溫暖見者異之謂公神仙中
人○長子燾字允大次子熹字允文克紹弓冶聲振膠
庠兄弟相師友謂口耳之學不足探原本聞姚江黃梨
洲徵君講學兩人渡江請益以一其指歸爲文一蹈先
民矩矱邑中舉文社拔幟者不出二難熹尤雋異年十
三遊括蒼適學使者按部至即與試冠一軍遂寄籍焉
後以渡江千餘里應試不便復舍去援例入北雍屢躋
場屋愛客有父風銜杯刻燭無虛日樂易可親喜揚人
善論詩力追正始晚尤嗜昌黎手爲輯注刊刻行世○

熹長子麟字履仁倜儻樹立幼讀書漏三下不休母再
三命之寢乃寢夜以爲常下筆一洒千言好遠遊結客
千里到處有國士之目康熙戊子舉於鄉兩上春官不
第佐粵西提帥幕賢叅軍名騰桂林象郡間粵歸奉母
命需次河干得淮安別駕板輿迎養治行有聲尋丁艱
歸里疾卒所著有履无咎齋詩集四卷纂輯小學說約
六卷藏于家

第十世掌垣陟齊公

公諱黃永字叔嗣大叅魯直公第三子也少穎異十四
補博士弟子員康熙乙卯舉於鄉五試南宮不售謁選
得楚之安仁令時奉 旨清文田畝公裹糧減從越陌
度阡秉公確勘豪黠無并兼良懦無賠累往來供垣不
擾動民間八閱月而歲事頌聲載道大吏上其狀徵入
引見邑令入覲自公始丙子分校楚闈得士吳堂等十
五人丁丑擢刑科給事中庚辰再晉掌工科給事中居
言路六載所言請廣額肅官方䟽銓政嚴保舉及澄清

大計革除糧規南糧隨漕帶徵諸疏皆切中時弊剴
詳明不亞古名臣封事悉荷允行 賜宴賜金 御書

宸藻寵賚備極優渥一時知遇爲從來掖垣所未有甲
申春請假省墓棲息丙舍眠食草土間者踰月不知寒
暑之中人遘疾而卒設施未竟時論惜之公仗義敦氣
節有進士吳某窶乏遊吾寧與邑令有舊懷刺欲見舍
人索金勿與舍人怒搆之令令弗納也公爲之言于令
令愈怫然公自爲投轄欵曲臨行厚贈之其任俠豪邁
類如此後吳念舊雨效推轂亦不忘國士之報云

第十世大司空文和公

附子世安

公諱鼓永字雖期號學山封少宰定菴公之長子也由
邑庠生登順治戊子鄉薦乙未捷南宮讀書中秘召試
輒最時相國素菴公謫居盛京封公以本生兄弟與于
徙公上書訟冤格於吏議遂瀝血草疏願代父行有緹
縈以一女子救父臣荷 聖朝孝治敢惜微軀之語雖
不得請然 世祖憐其孝思而不之罪次年以城旦春
封公得援贖還鄉國人皆謂純孝所致云庚子晉少司
成恭遇 聖廟御極轉侍講癸卯典試西江得士稱雋

是年冬擢大司成充纂修世祖實錄副總裁物望益

隆庚戌主武會試旋陞內閣學士一日上御閣命作

大字公伏地伸紙書二帝三王治天下之大經大法十

三字以進上改容禮焉未幾少宰缺人上慎重簡

公自右轉左凡六年銓政肅清丙辰總憲西臺適閩逆

初平蹂躪之後地方凋瘵公疏請蠲全省逋賦以甦民

困閩人德焉更念死事諸臣上表揚忠節一疏上謂

其通達國體優詔答之次年晉大司空戊午丁封公艱

歸里服除正擬赴闕以疾卒於家遺本上予祭葬如

制 賜謚文和公以文章才品受 兩朝知遇自少宰

歷冬卿不離講筵備顧問 上方倚重而曳履上昇時

論惜之○子世安字子敬號傳岩生而卓犖四齡喜騎

馬六齡愛習國書十九應京兆試中副車越二載而獲

雋起家行人考選授兵垣戊辰分校禮闈旋奉 命使

俄魯斯馳驅塞外萬里炎風酷日掘井而飲并日而食

不敢言瘁還朝擢掌刑垣扈 蹕南巡明年觀察大名

以峻直挂彈章謫徙秦中逾年蒙 恩放還不兩月有

坐臺之 命又居塞外者決歲旣而河督檄委南河堤

壩諸工工竣復赴北河皆著勞績辛巳始得歸田築室
于吳門之西山上沙村以文史自娛者二十餘年一日
無疾而逝所著有出塞紀畧二卷扈從紀畧二卷

第十世明經子長公

公諱堪永少保素菴公之季子也性至孝年十六能以
文章中副車未幾少保公緣事謫奉天全家被遣嚴
旨峻切骨肉倉皇無所措公獨鎮靜謂從親塞外生死
相依何患焉奮袂爲諸子先少保公領之時公已訂婚
於徐萬里安置分無還期竟不敢娶堂上欲爲公置媵
侍公婉辭之居九年遭少保公之喪悲來填膺終日長
號踰半載而疾不可爲從親地下年僅二十有九又四
年蒙 恩放還得從少保公歸骨于里而徐貞娥早鬢

以當門矣子孝婦貞天故艱其遇以作之耦幸歟不幸
歟後數十年當事始上聞 子旌復其家又公之世父
耆鄉公諱之邁殉中丞之難事亦相類宗人亟稱之

第十世奉常勿齋公

公諱齊永字大年封太常立菴公之長子也英敏有斷
讀書穎異文極典贍道勁弱冠即食餼郡庠康熙乙卯
亞魁於鄉丙辰聯捷南宮令山東臨邑經權互濟恒得
法外意甫下車值蝗災即出庫鎡僱民捕之典守者以
考成苦諫公曰蚱蜢蔽天闔邑民命在呼吸緩則無及
典守者不能阻浹旬捕蝗萬石許臨邑竟大稔公徐以
羨餘補庫如額即革去之曰吾取羨以捕蝗也不則早
革之矣邑快手蕭某與僱工婦姦其子怒詈蕭令往市

糴斗米伏道左以襪帶縊殺之使其母控官而嫁禍於
隣某仇殺公廉知其母爲蕭之僮工婦即詰之覩其色
有異疑焉禱于神夢空中懸匣中人三字公悟亡訓一
斗古之團甲即今之快手必蕭某矣嚴訊之見兩襪一
繫帶一繫草取帶驗之與絞殺帶無異遂俯首吐實一
邑稱神舊例收漕在縣倉撥運德州公念城西村甚隔
遠詳請徑送州倉數十里村民歲省縣倉加耗車費不
貲公私俱便報最擢御史巡視西城所轄有王某築室
其匠石傾跌死同官覩王富欲上下其手公據理力爭

王其身家獲全陞掌道承審拒捕盜案公讞確按律奏
決尋獲黨反不肯服有勸公潤色供狀或自劾以免失
入之咎公曰此罪囚一時昏愚代人抵賴法不可撓寧
受處分耳已而 旨下令覆訊囚始吐先遁不知情得
援例末減公竟無罰其忠直無隱風節矯然類如此辛
巳擢通叅壬午晉太常少卿公天性孝友與人交必誠
信急人之難不惜傾囊而服官廉絕一絲雖經奉差巡
鹺課稽錢局俱洗手視事洒然爲清白吏居奉常未浹
歲以疾卒於官年僅五十七耳設施未竟又甚惜天之

不永其齡也



海寧陳氏家譜卷第十七

十二世孫應麟重編

十四世孫敬璋全訂

大傳三

第十世司寇丙齋公

附子世儀
孫克鑑


公諱論字謝浮封諭德贈大宗伯簡齋公之長子品貌

嚴重望如泰山北斗然氣度恬和襟期坦白與人藹藹

如也少嗜書為文章極醇遠有聲膠序間順治丁酉年

二十二登賢書辛丑成進士康熙甲辰廷試館選授內

宏文院庶吉士改檢討公學有根柢考據典確 內廷




纂修之事不下數十種悉歸公手丁未分校禮闈得士
皆俊髦然落落不競進淹滯木天三十年至己卯聖
廟廉公宿碩特簡典試中州試竣 敕九列臺垣諸臣
甄別主考官優劣新城王公士正時爲總憲昌言于朝
曰今科典試公明應推豫省爲冠廷論翕然稱允是年
充日講超遷少詹又 特授副憲不務搏擊而風采凜
然正已率屬物望益隆不半載擢少司寇寇平反諸獄全
活無算時冬部以永定河隄工奉 命廷鞠衆務刻深
公謂受勘皆夙望大臣無心獲戾終當荷 聖仁寬宥

因與同官虛公推勘據實奏請果蒙 俞旨得量從減
釋公之正大和平不周內深文不模稜狗衆皆此類也
甲申冬有讞案未當曹司輒歸咎堂官公與尚書新城
王公同日去官歸田後居東郊閑園里社雞豚村莊花
月怡然自適不以得失介意元龍自乙丑入翰林與公
同朝二十年棣華之誼久而彌篤甲申余陳情歸養值
公賦閒居屢從先大夫過閑園尊酒流連翛然有塵外
之致然東山養重天下喁喁望公復起乙酉 駕南巡
公迎覲 天顏應制賦詩 上稱賞賜御書將有枋用

之意而年踰古稀遽控鸞鶴中外缺望公雖老林泉家
訓官箴移孝作忠之道時時勵其子孫子孫之能其官
皆公之遺緒也所著有來寄軒集燕臺偶存鈴閣餘吟
歸田錄各若干卷藏於家○長子世儀令海澄多異政
澄故兵民雜處漸山一溪入澄江通鷺島所產材木悉
爲營弁侵踞且私創津稅漁利世儀力持之私稅悉革
材木盡還民間南靖西天巖山深多虎民往來結伴持
械營弁擒之指爲不軌將鍛鍊成獄南靖於海澄爲隣
邑世儀不忍民以無罪死力自請會勘全活數十人一

日謁提帥見俘囚甚衆熟視之中一人曾以他事就質
縣庭者知爲良民受誣立白之帥釋之其剛果不畏彊
禦類如此他若置烟戶循環簿設弭盜金鼓樓捐資置
文廟祭器難更僕數兩攝龍岩龍溪俱著循聲海澄祀
名宦○世儀子克鑑少有雋才十六補弟子員隨父海
澄通吏治謁選得屯田主事時 孝惠章皇后山陵甫
創經費百十萬緡檔案旁午夜以繼日不假手胥吏匝
月奏稿成䟽上稱 旨佐大司空蝶園徐公查勘河工
用勾股核算堤埝延袤不爽尺寸又以鉅錐探隄根深


淺以別新修舊築尤灼見無道形徐公奇其才與兩少
司空擬交章汲引鑑以生母朱病乞假中道聞訃服闋
以嫡母葛年高不復赴補色養備至篤宗誼好施予捐
重貲葺寧學宮寧遇潮災暴骨徧野悉爲之掩瘞入省
志行誼傳著有閩遊草祀離集各若干卷



第十世封兵垣待贈副憲宋齋公

公諱訐字言揚贈大宗伯簡齋公之第五子也博聞強
識言動皆有法則十一補博士弟子員明年就甥館爲
太岳黃文僖公所器重夙夜潛修學業日進與許宗伯
張戩侯諸前輩同時食餼文名鵲起未幾姚江黃徵君
梨洲至寧講學公預司講精研性命之旨爲徵君高足
弟子并以籌算勾股之術傳焉承父命析居海鹽即鄭
端簡公故宅因以師簡顏其堂力崇儉約以導鄉黨初
授寧海訓導游吼山謁禹陵渡曹娥并與好事者直窮

赤城瀑布宦情甚淡自以為生平勝遊賴此一山所至必紀以詩既晉淳安教諭拔士方文翰若芳兄弟後皆以文章名於時提唱學者必先行而後文士風翕然丕變間有不率教者開導再三榎楚收威其人翻然卒感之如父母秩滿陞溫州教授子世儒輩先後登甲乙榜公遂告歸杜門常舉柳氏家訓門第高可畏不可恃二語刊置座右日朝子姓而訓誡之與許宗伯為娛老會一時過從如楊耑木曹希文即少年壇坫中人尤一時佳話雍正辛亥世儒由中州入覲蒙 世宗憲皇帝垂



詢公年 御書松柏堂扁額并人參貂皮寧綢等物以

賜年高德劭上邀 九重錫類人以爲庭訓義方之

驗云公性至孝痛簡齋公未屆古稀因繪夢萊圖以志
感晚年猶展卷追慕讀書鄙章句嘗論寧鹽海塘形勢
不同寧塘宜於塘外排椿設櫃以護沙鹽塘宜於塘身
縱橫壘砌以固土又論浙西水利有上河下河二水下
河兩支易明惟上河兩支宜開濬故道設壩束水以直
通黃灣皆濟時碩畫當事恒就公諮訪平居尤講求荒
政以陳幾亭先生集爲最善世儒分賑東安遵其法行

之而利則提命之成效也文章峭厲淡宕詩喜韓蘓而
尤服少陵先選宋十五家詩以矯世之僞爲唐者復選
唐省試詩及杜詩以救世之托爲宋者與自訂詩集及
勾股述勾股引蒙諸書俱鏤板藏於家先是先公經紀
高曾墓產搏節贏餘一千八百緡更迭交代者數矣後
公董其事以積貲置產百八十畝歲收租入贍支下之
貧乏者俾祖澤利賴永久此尤敦本善後之舉特書之
簡末

第十世萊州郡守任齋弟

任齋諱謙字廷益贈大宗伯簡齋公第六子爲人虛止
靜默甫就塾攻苦不少懈弱冠後遊庠食餼文聲日噪
子舍恪勤居喪致毀服闋奉遺命居杭之梅東里九踏
省門嘗題詩舉子屋壁曰寰海吾伊同此夕名山甲乙
任他年時康熙癸酉中秋也是冬就教寧海旋謁選得
員外郎擢郎中廻翔戶刑二部凡十年爲京江相國新
城司寇所引重有劇務輒以委任之出守萊州立綱振
紀防海則設團練之法與水師爲犄角治河則仿竹落

之制貫衆石以禦衝他若建倉貯穀構廠拔士重修郡
志皆捐重貲爲東萊久遠計署有老槐歷久不生枝葉
忽抗莖垂條歲加茂焉羣目爲神槐且謂古者樹槐聽
訟實賢守政簡刑清所感召在官之日賴德配沈宜人
家居持門戶逮報最晉秩臬副值宜人訃音至悲不自
勝遂賦歸田段橋之東購莊一區乃董文敏別墅因懸
文敏所書浣雲館于閣而以就莊顏其門曰是菟裘也
吾將終老矣或泛扁舟或乘籃輿酒盃詩卷彷彿香山
洛社蓋二十年焉生平不妄交接擇言而道家居後當

事過訪或歲端月吉一詣公所鄉邦利弊亦不以局外
緘嘿如西湖之泉流入湧金門者自將軍駐防營內盤
曲而出武林門至響水闢故閘則水落上塘由東新關
直達海寧乃兩邑灌溉之資時營內水道淤塞力請中
丞移咨設法開濬營內得通舟楫明年秋旱致書邑令
曰白太傅所謂啓牖一尺值黃金一觔正此謂也父母
曷不爲民請命開響水閘放水尺許乎令從之是歲旱
不爲災又西湖沿涯曠土奸胥私佃於民給佃帖收稅
托名抵江田缺額其實江田之糧尚未豁也昌言于撫


軍高安朱公檄縣勘追佃帖而私佃之弊遂革湖民便
之其利益桑梓類如此晚年有詩二卷古文一卷藏于
篋衍強半皆莊中所著

第十世大宗伯予告清恪公

附第三子世仁

公諱誥字叔大號實齋贈大宗伯簡齋公之第三子而
贈大宗伯澹菴公之嗣子也幼端重寡言笑舉動若成
人時王母顏太夫人在堂顧而色喜曰是佳兒也吾後
其昌乎九歲善屬文舉茂才康熙壬子登賢書受知于
華亭沈文恪公丙辰禮闈遂寧張公得卷亟薦以溢額
見遺未成連躋北堂急需祿養赴補中書科中書己巳
召試直言政事得失䟽特擢吏垣辛未以養親歸旋丁
內艱丁丑服闋入都補原職戊寅擢掌刑垣遇事剛果

不避嫌怨在吏科則抑國子生贊禮陞職之驟劾都勻
府土司承襲之遲而銓政爲之肅清在刑科則參陝西
省捐項以免官生萬餘家之逮糾蒲臺令威逼以雪鄉
官王觀成之寃而爰書悉從矜慎至次丁畱養一疏著
爲繫令黃河閘制一議急下廷臣尤卓識昌言之表表
者也壬午陞大鴻臚奉 命祭 陵道却餽遺甲申遷
少廷尉爲文勒石獄多平反未幾而副憲之 命下矣
勘正潛江民穆鸞條被讎汙鱉一案擘肌分理駁令覆
審時爲潛令者即今高安相國朱公會以去就爭之者



也與公持論若合符契 聖祖仁皇帝稔知公亮直清
介宜任封疆命撫黔者四載調撫湖北者三載黔地犖
确而法制未備楚北殷庶而稗政未除公治黔主創治
楚主革治黔執成法治楚相便宜如募民墾荒奏免其
升科催嫗育蠶召遠近觀法教民多樹果木創建營房
三千間區別兵民因利開源所謂創而執成法者也公
則行之於黔如借庫帑糴米減糶以平價除軟擅硬擯
諸私派以甦困巡閱荆襄險工惰者以勤徧視州縣蓋
藏虛者以實歲却鹽規二萬金舉墜補偏所謂草而相


便宜者也公則行之於楚辛卯晉大司空察冒破沐冗
費壬辰轉大宗伯夙興夜寐蒞事益虔丁酉十二月
孝惠皇太后升遐諸大典禮皆公叅訂施行同列羣服
公練習掌故云巳亥春忽感時症血氣衰耗閱三月不
視事具疏引退 上慰畱再三公終以病廢固請 特

命相國馬公華亭王公至邸第視疾 溫綸纏摯賜予

纘紛庚子七月抵里門展墓睦族分賑課文居年餘以


聖廟七袞萬壽先期入京爲釐祝計不謂抵京後衰

壯復作 龍馭卜賞之日即公捐館之期炯炯丹忱存



歿一致鼎湖飲泣獨遂攀髯古所云乘尾箕而在帝旁者公其人歟遺疏上 今上皇帝篤念舊臣賜祭葬如彛典謚曰清恪公性至孝事本生父母父母生養沒葬竭誠盡敬歸田掃墓猶汎瀾孺慕御家嚴肅五子鵲起科第日勗之以持盈戒滿趨庭之際儼若廟堂好儉樸不事華飾夏葛冬裘取稱寒暑僮僕衣紉綺者輒裂棄之清畏人知丁卯分校順天武闈庚辰會試同考以及稽察錢局之差鞫審祭告之使黔楚之屬吏冬官容臺之奏銷解冊莫不杜苞苴絕情面壁立萬仞巖巖如也

天姿英邁日手四書五經至老忘疲謂制義闡發聖賢
 理解宦成後猶日操觚作興文教持衡不爽庚辰得會
 元王君露等二十三人皆一時俊彥尤負知人之鑒如
 高安朱公滄州陳公皆公所特薦而文端沈公則更識
 之未遇時黔之德新書院楚之江漢書院悉闢而新之
 躬親督課人文蔚起門生子弟相聚必商確古今旁涉
 論律岐黃青烏家言所著有四書述詩經述易經述易
 卦玩辭述通鑑述通鑑纂要律述地理述四書題旨義
 學訓規研北樓新藝信學齋偶刻各若干卷並鏤版藏



於家曰吾不敢當作者任也於戲吾家邀祖宗遺澤壬
午癸未之間兄弟子姪官於朝者十人而同祖者公及
司寇兄與元龍三人觴詠過從殆無虛月嗣後宦轍中
外睽違戊戌元龍自粵入拜冬卿值公掌秩宗六卿之
長兄弟備員其二同列羨焉迺聚首三載公忽引年考
終而一老子然獨存晚晚頽廢蒙 聖天子厚恩五年
政府佚以林泉今昔之間感慨係之茲於蒐輯家乘之
餘猶得按公行狀檢公遺藁以傳公大雅不作音徽尚
存能無畢然高望也乎○第三子世仁字元之號換吾

好學工爲文尤喜制義搜羅披閱竟日忘倦康熙戊子
登賢書時昆季已先後館選及典外郡元之再上公車
不第益自奮勵經史列左旁行庋右兼讀道書涉及算
學靡不精曉乙未捷南宮入詞苑母查夫人病兩目不
見元之聞而寢食俱廢陳情乞歸養有名醫能以神針
治療延之疹視則曰年高未易復也先峻補培元一年
始用針而左目明又二年而右目明遠近咸謂元之額
天虔禱躬調藥餌之所感不僅醫之能事也仲兄歿撫
其子如已出曰幸有成立則兄亡而不亡耳生平真樸

無雕飾遇人不爲崖岨被服操履如寒素賢哉元之而
天促之年可悼也已





第十世郡守香泉公

公諱奕禧字子文號六謙晚卜宅於吳之葑門更號葑
叟香泉者公令深澤時憇大忍寺飲泉而甘之甃石作
亭其上以比永叔之醉翁坡公之喜雨名之曰香泉因
自號香泉翁公翰墨妙當代海內翕然稱之曰香泉先
生故香泉之號獨著公性至孝少年夢登宮闕金甲神
列坐見公起立曰是孝子也自是益勵厥行父司李公
遠官嶺表公依母沈膝下誦讀承歡後萬里奔喪雖弱
齡戚易中禮嘗刲股以愈母疾瘡痕垂老宛然又嘗夢

昇一樓滿貯隄糜一神人謂之曰供子一生揮洒書法
益進詩文益工數躡場屋起家安邑丞擢深澤令歷戶
部郎石阡南安郡守宦轍所至不名一錢慕公書者填
門重貲爭購公資之以補清俸之不足每徙一官垂橐
不能成行則多方托鉢踰時而後俶裝公卿士夫雅重
公者亦不惜解囊欣助故公屢涸屢潤但終不爲栽桑
種橘計亮節清風至今可想見也其丞安邑也羣爲公
惜公曰先儒有言心存利物雖一命之微于人必有所
濟吾敢薄丞耶奉公盡職著有勞績公餘營閣三楹取

張茂先鷓鴣賦中語顏之曰翩然甚自適也其令深澤
也有妖黑氣類犬形夜撲人皆傷公爲文牒城隍次日
忽大霆擊落北臺亭角妖遂絕畿南患蝗公下鄉督捕
飛集如故因齋戒爲文告八蜡有寧食我肺腸毋毒我
百姓之語蝗皆以一足挂禾穗而死遂大有年邑風俗
媮薄輕棄其妻雖老婦尚鬻錢三數百詳請大吏嚴禁
通行八府奉委賑飢贊皇星夜馳赴贊令尚俟檄至公
曰是磬磬者寧能待耶擅發之咎予自當之不數日徧
給數萬人猶有乞食隣邦聞賑而歸者公急請續撥米

二千石又全活數千人其任農部也奉簡董開通惠

河使漕糧直抵朝陽東直兩門櫛沐風雨四閱歲而工

竣軍民稱便歲省運費若干其守石阡也郡故荒瘠案

牘寥寥經理月餘大綱已立入省謁中丞輒以他郡疑

案命公鞫之有清鎮縣誘逃一案公廉得罪人并究出

他案誘逃多人發奸摘伏通省稱神已而清恪公撫黔

命下循例迴避調補南安其守南安也一以振興文教

爲任重修學宮纂述郡志郡有道源書院祀周元公惇

頤及程大中公昫歲久頽廢公急謀修之以公務道出

贛州訪王巖先生遺編序而刊之以版付其後人曰此
不獨勗勉乎陽氏亦欲爲此邦人士法式耳甫半載以
疾卒於官於戲公之志殆未竟也公氣誼醇至伯兄來
深澤病痢公廢寢食手調參餌者百日終不能起公號
痛傾橐囊事石阡調回治數世宅兆伯木如公未入土
公一體厚葬之孤甥沈大成就婚平陸公備儀物成其
聘娶甥婦亡復經紀以賚發其喪無倦容所著已梓者
有虞州集虞州續集春藹堂集未刻者有秋雨齋集笑
門集陳子日記雲中紀行畝香新牘北行日記葑叟題

跋綠陰亭集各若干卷藏於家石刻有子寧堂法帖等
行世元龍少公四歲角總肩隨甲戌冬公入拜省郎同
朝者又九載公之行誼政事覩記熟悉知其原本經術
者深即出身加民往往有卷軸氣今世最重公書而不
知行誼政事一一可傳如此又安忍而沒之

第十世相國文簡公墓誌銘

海昌相國文簡公以盛德大度膺

三朝知遇致位宰

輔大耋引年仍食天祿海內歎其賢而榮其歸居四載

薨於里第遺疏上

賜祭賜塋賜諡一一如禮斯所稱

高朗令終者歟公歸田展其考贈相國公之墓指墓左

地顧令嗣編修愚亭曰他日魂鬼長依先人吾願也愚

亭心誌之公沒愚亭痛歲月之不留而耿耿於墜言占

其地食墨卜期於八月日時皆集癸亥遣使奉狀泣血

致書於貽直曰先公日月有時將葬矣幽窆之銘敢再

拜稽顙以請予初未之敢任也既思先大夫與公同館
交最深予隨館後學奉教三十年公不鄙予以女孫室
予子奕昂紀羣之往來樂衛之過從公之勲德行誼皆
得諸覩記讀編脩書恫乎有餘慕矣其奚敢辭按狀公
諱元龍字廣陵號乾齋姓陳氏世居海寧文章科目甲
兩浙曾祖大叅公諱與相祖太學生諱元成父明經諱
之闇皆以公貴贈如公官曾祖母吳繼王祖母顏母陸
皆贈一品夫人公天質粹純湛深經術少時與人接便
饒氣度樂道人善煦若春風而萬類皆得弱冠試成均

宋文恪公一見賞識中雀屏選僚壻如婁水相國且折
年位下之兩公黃扉巨老與公臭味不相差池故傾倒
若此予觀古今臣品每衡量於其德其福其遇之間而
統論其自少而壯而老之際求其心跡雙清身名俱泰
生而為麟趾鳳毛出而為慶雲甘雨身依日月貴盛而
不矜道際風雲卷舒而自得進則同朝慰焉退則薄海
思焉浩浩乎其德福亦應之休休乎其度遇亦肖之兼
此者蓋難其人今於我公見之矣公始以文章受知
仁廟會試廷試皆第二人起家編修時南書房初設

慎選供奉張文端勵文恪高文恪而外雖九列大臣不
得與公特被 召入有所撰擬必稱 旨晉侍講歷官

坊傑直扈從無虛日公於是乎日月論思朝夕獻納

仁廟知公益深歷陞掌詹掌院少宰兼教習庶常公素
以汲引人才扶植後進爲已任至是時月旦持衡風流
宏長士林仰公如太山北斗海內翕翕然望公之爲霖
而棘槐遶尊亦皆帖心拭目置公臯契間也 仁廟察

公爲少宰能其官有大吏才 命撫粵西粵故瘠土公

曰是不可以不養重農積粟三年而民懷生矣粵近邊

徽公曰是不可以不教建學宣諭又三年而民向方矣
凡所設施皆本經術持大體不肯為峻急孤高一時
之譽重建興安隄河悉復漢馬援唐李渤故制工興而
神石出焉會審三水流民同事者欲深致之公曰噫

聖天子不忍一夫之不獲奈何不為請命疏上悉全活
之公去粵十年以他事奉命入粵粵民扶老攜幼擁
迎道左僉曰仁人也不可失也嗚呼是可以觀公政矣
入覲晉大司空裁糜費蠲賠累於南北河務悉心諮度
浙江海塘建議與朱文端合今用其法浙人利賴轉大

宗伯未久 仁廟登遐公攀髯莫逮旋以原官侍奉

景陵朝夕依戀 憲廟鑒公忠誠已酉以賀元旦入朝

即秉鈞衡蓋至是而海內翕翕然望公者果副也而公

年七十八矣癸丑抗疏請休 上勉俞晉階太子太傅

命公卿祖帳道旁觀者如堵 皇上登極篤念舊臣

即家 賜給一品全俸疊 頒上方珍品公沒而 褒

終之典畢備所以寵異公者與 兩廟一揆焉 聖明

繼序運際中天公稟中和純粹之氣篤生盛世翔步泰

階垂紳正笏稱太平宰相水邊林下作宇內完人天之

隆公之福而亨其遇者千載一時也非甚盛德大度曷

克致此公性純孝宮詹時眷注方殷陳情乞養上

成其志顯揚無忝贈公存沒邀賚卹異數曠古未有

公稟庭訓以作忠聖朝體堂廉而錫類良非偶然晚

營宅兆猶傍松楸公蓋終身孺慕者歟誼篤友于仲叔


早喪哀痛逾常撫教孤姪至於成名而後即安雖大位

不忘布衣交後門寒峻巧之聲華而掖以上進者比比

也同僚屬吏濟彼涸轍而歸其旅櫬者數數也獎人之

善薦剡何多也矜人之過彈章絕少也桑梓捐千緡置

學田以助膏火此皆落落大者可紀可傳餘未暇殫述
 也康熙丙子扈從北征深入不毛凱還而飲至中朝歎
 羨以為此文臣之武畧節鉞西南宜其緩帶輕裘而猺
 獠屏息矣仕途坦夷順適唯蘭峪七年羣以為岑寂地
 公結茆蒔卉若將終身而卒膺枚卜入黃扉仁人所履
 無陂不平遂初之園賜安之堂天若預設以娛公之老
 者益歎我公德之厚福之隆而遇之亨也所著有愛日
 堂集行世書法績密道勁兼饒逸氣片羽落人間爭寶
 藏之公卒於乾隆丙辰八月二十五日距生順治壬辰



十月二十九日享年八十有五配宋夫人長洲相國文

恪公女累封一品夫人相夫型家具著儀法詳公自撰

行述生順治甲午六月十七日卒康熙辛卯九月二十

七日繼王夫人封一品夫人公撫粵以後皆夫人庇內

政蘭峪起居寔左右之生康熙壬子八月十六日卒乾

隆丙辰二月二十二日以乾隆八年十月十有四日亥

時合葬於海鹽縣都水畝六步墩贈公之阡之東子一


邦直官編修王夫人出娶汪氏繼王氏皆封宜人女二

長適觀察王奕鴻次適郡守徐德秩撫姪女一適吏部

侍郎湖南巡撫蔣溥孫男二善貽廕生善慶太學生俱
未聘孫女二長適余子刑部員外郎奕昂次幼未字貽
直旣誌公之大畧而系以銘曰 猗與海昌道亨名泰
景星鳳皇有覩斯快西清作賦燕許鴻章亦馳露布佐
定朔方武蘊文含載登清要銅柱天南瘴消越嶠尚書
履錫天下喁喁東歸袞舄鼎實棟隆旣竹旣絲羣猶望
起環而祝之百齡未已大糈玉粒賁彼林泉 帝思耆
碩。仁 憲之間忠在鼎湖孝惟風樹六步我我相羊
而慕豈無新址是曰歸全副禕同几二配從焉緬想流

風萬間千頃永固斯宮萬有千稔





第十一世文學補菴

補菴名枚世字爰立文學腹貞公之中子也自理學乾
初先生以孝友篤行振起鄉黨間諸子姪奉圭臬焉補
菴其白眉也乾初公深器之嘗勗其子敬之曰爾他日
能師法爰立兄一二便佳大小阮針芥可想見已補菴
歲十七補郡學弟子員旋丁明季喪亂即棄去與龍山
一二執友爲省過之會稽其日史所錄過之多少而次
其賞罰鈎瑕摘類寧過受罰勿輕受賞父晚年病風攣
不能行動補菴謝絕一切晝夜侍寢處一逢危劇便震

恐哀悼如不欲生五六年如一日兄弟間惇厚雍睦蓋
怡怡而兼以切偲者尤與從兄潮生從弟敬之兩人互
相切劘嘗與敬之書曰聖人論達質直好義即繼以察
言觀色慮以下人慎勿謂質直好義便可徑情一往其
生平持躬接物得力於此數言者多早年畧涉治生之
學旣謂其害道輒屏棄之無何鰥居子女幼不得不問
米鹽却洒然於中不爲物役同學皆歎爲難及見義必
赴然亦稱情量力未嘗好爲苟難緩急叩門必應不責
其必償間償亦不辭容體修整言辭清辨溫恭廉隅望

而知為正人君子坐一室圖史几研陳設楚楚窗外植
一蟠柏吟嘯其中更字霜柏子屬執友許大辛作霜柏
說既而語許曰吾所謂霜柏將用霜以勵柏而非敢恃
柏以傲霜今子之文得無勵柏之意少乎吾滋惕矣其
終身自治之嚴如此工詩善書率皆渙發於性靈而一
就夫古人之繩尺年四十二而卒乾初公哭之慟有詩
懷之曰至今思孝德是處有深情渺矣吾爰立賢哉莫
與京



第十一世處士敬齋

附子克壘

敬齋名翼字敬之理學乾初先生之子也初讀書質稍

魯不甚當父意然至性過人嘗侍母鼓疾目不交睫者

三月母將歿曰爾誠孝若此必非不識字者柰何使爾

父終日歎嗟我死爾當努力讀書敬齋涕泣受命時年

已十九矣即從苦次發篋無晝夜讀之二十三作詩古

文潛攜以就正父執一日父執颺言曰陳敬之當是文

章作手父始索文觀之亦為驚喜性極平恕遇公正輒

義形於色一介不苟取有宗人中落售產二百餘畝以

敬齋長者况其介紹例得酬金數十緡固辭不獲則以
與售者之子俾續堂上甘旨費其耿介類如此乾初公
晚年病拘攣必抑搔拊摩方少安飲食起居悉需人敬
齋卧床第旁晝夜不離隆冬盛暑微聞聲喚即起立問
所需十二年如一日君子以爲難弟患癰潰决日親洗
拭之至觸穢氣生腰疽幾不起弟歿爲弟嗣從姪以慰
嫠婦析已產與之并撫其孤女生平爲文章由穠郁而
蒼老而清真計古今體排律絕句約萬首賦序論說傳
記書贊雜文約千首嘗論學者讀書時不可着一毫已

見作文時不可着一毫規撫古人之見非深於文者不能爲是言也然終不以文炫世無心進取畢其身不赴一試樵蕪不爨而已里中尤以是高之先大夫嘗延致敬齋課弟姪輩時與余同研席唱和極多故余知敬齋最深○子克罔字震修性度恬和春風煦人望之若有仙骨祖禰皆高隱至克罔始習舉子業資極敏尤謙謙受益構藝皆卓絕及門膾炙之以獲售者數矣博洽宏瞻發爲古文辭尤耽詩接少陵正脉八歲時即作冬夜懷祖父詩乾初公欣然和之亦其夙成然也應童子試

輒前列受知于太府馬公見五拔第一有浙江才子之
目遂入泮三十以後遊京師游大名出居庸關遊東萊
遊南昌游襄陽最近者京口也登臨眺覽詩文日富然
數奇終不得自售晚更好道自號雲怡子取陶貞白嶺
上多白雲祇可自怡悅意蓋其所得遠矣生平事母至
孝省覲歸悉解遊橐供堂上不畱私蓄人謂其能養志
與人交敦誼薄財有新安吳友負會鏹百緡沒齒不以
挂口吻間客京口時常讓館席於楊孝廉耐菴楊甚德
之所著有雲怡詩草各若干卷杜詩注十卷藏於家

